

Ufficio Stampa della Provincia autonoma di Trento

Piazza Dante 15, 38122 Trento

Tel. 0461 494614 - Fax 0461 494615

uff.stampa@provincia.tn.it

COMUNICATO n. 192 del 30/01/2025

Di studjént von universitét vo Innsbruck, Poatzan un Tria mangse innschraim dar editziong 2025

Euregio Brussels School 2025: ma makse innschraim sin atz 28 von hornung

[Cimbroy] Gian z'sega bazta vürkhint hintar in türn von européan istituzionen atz Bruxelles, vorstian bia 'z funtzionarta un bazta tüat da européan Uniong un da internatzionàl diplomatzia, drauren garade pinn politike un pinn hoachan funtzionardje un vângen di ECTS (European Credit Transfer System) vor soin kurs laurea: ditza iz bidar möglich von summer 2025 vort vor di studjént inngeschribet aftnan Master von universitét vo Poatzan, Innsbruck un Tria. Berda bill nemmen toal dar Euregio Brussels School 2025 mocht inngem soin vorsch vor atz 28 hornung boda khint.

Dar interdisiplinar Kurs iz augelekk von Àmt von Euregio Tiról-Südtiról-Trentino atz Bruxelles. Disa iz da 14tege editziong un bartze haltn von 23 sin atz 27 prachant von djar 2025 in di hauptstatt von Bèldjo un iz vor di sudjént inngeschribet aftnan Master, di sèlln boda machan in Erasmus+ o, vor alle di kürs laurea von universitét boda soin khött obar, 'z zil iz daz sèll zo haba garade di krédite vor soin kurs laurea.

Dar vorsitzar vodar autonome Provìntz vo Poatzan un vorsitzar von Euregio, Arno Kompatscher, dar vorsitzar vodar autonome Provìntz vo Tria, Maurizio Fugatti un dar lântshaupmänn von Tiról Anton Mattle schupfan di sudjént zo nemma toal in formatif prodjèkt, khödante ke azma bill machan vürgian da Européan Uniong mochtma süachan z'arbata hèrta mearar pittnândar übar di grentzan. Kooperarn zbisnen di State, di Redjongen un di Provìntzan atz Bruxelles lekk au sachandarn boda gian garade zo interesara 'z lem vo alln in pürgar. "Azma bill hârn guate pürgar boda bizzan bia un baz, izta mângl azza khennen bia 'z funtzionarta di politika un di vüarom vodar Européan Uniong; 'z iz eppaz boda pröft in kamöüschaftn o vorstian un seng vo nâmpm bia 'z khemmenda gemacht di gesetz vodar EU. 'Z iz bichte darzuar vor da öffentlesche vüarom un vor di laüt boda vürvüarn di lentar, abelirnen un âstèlln laüt bodasen drinndarkhennen übar dar organizatziong un bia 'z arbateda da EU un dar Euregio sèlbart", asó khönsa Kompatscher, Fugatti un Mattle.

Ma vorst zo kandidarsase übarhaup in sèlln studjént boda bölln leng nidar nâmp in sèll bosa lirnén in di universitét eppaz mearar pratiko un hârn gearn drauzoreda pinn européan politike un pinn ândarn studjént von Euregio Tiról-Südtirol-Trentino. Dar progrâmm hatt an groazan interesse vor berda bill machanen a kariara in politika, odar studjart modèrnega stòrdja, übarsetzung odar macht kulturàl studje, odar lai ainfach hatt gearn aulegen internatzionàln nèt看 un khennen laüt vo andre lentar übar di konfin.

Alle di informatzionen übar bia innzoschraibase venntmase aftz [disan link](#) (dar link iz atz iglés)

Übarsetzt von Schaltarle vor di zung von Toalkamou vodar Zimbar Hoachebene

(cdt)